



Lajmëtari i Radio Marisë

Prill 2011

Viti III, Nr. 4

Në këtë numër
do të lexoni

- Fjala e Presidentes së Radio Marisë në Lezhë 2
- Fjala e Don Prekës në bekimin e selisë në Lezhë 3
- Java shpirtërore e lutjes në Jagodë, Kosovë 4
- Seminari për Ungjillëzim në Tiranë 4

Lajmëtari i Radio Marisë është organ i Shoqatës Radio Maria.

Tiranë

Rr. Papa Gjon Pali II, Nr. 4

Fushë Kërçik

Babrru, Paskuqan

Tiranë, Shqipëri

+355 4 2 346 346

Shkodër

Sheshi Papa Gjon Pali II

Shkodër, Shqipëri

+355 22 24 08 52

E-mail

info@alb.radiomaria.org

Përgjegjës

Don Prekë Lazraj

**Radio Maria,
Hiri i Hyjit në shtëpinë tënde,
mund të dëgjohet në:**

Rrëshen e rrethina

FM 100.7 MHz

Tiranë, Durrës, Kavajë, Berat

FM 91.4 MHz

Shkodër, Podgoricë, Ulqin

FM 102.2 MHz

Lezhë, Laç të Kurbinit, Mamurras

FM 89.6 MHz;

Pukë, Fushë Arrëz, Tropojë,

Kukës dhe Kosovë

FM 90.0 MHz

www.radiomaria.al

FJALA E IMZOT VITALES NË FESTËN E LAJMËRIMIT TË ZOTIT



Të dashur vëllezër dhe motra,

është nderim i madh për mua që e kremtoj këtë Meshë të shenjtë sot në këtë të kremte të festës së themelimit të lindjes së Krishtit apo Zojës Nunciatë. Kështu jemi të bashkuar edhe me famullinë tonë që kemi këtu në Lezhë, "Zoja Nunciatë", dhe nevojitet një bekim i madh nga Zoja Mari mbi të gjithë ne.

Desha të theksoj disa shprehje që tashmë i kemi dëgjuar në Ungjillin sipas Lukës. Çfarë i ka ndodhur Marisë? Ungjilli na thotë se një engjëll shkoi në Nazaret te një virgjër, Maria, që ishte e fejuar me një burrë që quhej Jozef. Një familje e thjeshtë, një familje punëtore. Engjëlli hyri tek Ajo dhe e përshëndeti me këto fjalë: "Të fale, o Hirplote, Zoti me ty." Fjala hirplote e shqetësoi Zojën Mari, sepse nuk ka asnjë njeri që është Hirplot, përveç saj. Nëse nuk do të ishte Hirplote, do të ishte e pamundur lindja e Jezusit, që ajo na e ka dhuruar neve. Maria i dëgjo këto fjalë duke menduar se çfarë do të thotë kjo përshëndetje. Engjëlli e kuptoi se Maria ishte e shqetësuar dhe i tha: "Mos ki frikë, o Mari, sepse ke gjetur hir para Hyjit." Për çfarë ka gjetur hir para Hyjit? Çfarë ka bërë Maria për të gjetur hir para Hyjit? Jo ndonjë gjë të pamundshme. Hyji e zgjodhi Marinë për të

qenë nëna e Hyjit, për vetë faktin se ajo ishte një vajzë e thjeshtë, pa mëkate dhe se ishte gjithmonë në kërkim të së mirës. Engjëlli i thotë: "Ti do të mbetesh shtatzënë, prej teje do të lindë një djalë që do të quhet Emanuel, që do të thotë "Hyji me ne". Maria duke dëgjuar këto fjalë tha: "Unë jam shërbëtorja e Zotit, më ndodhtë siç the ti."

Maria, nëna e Hyjit, dhe nëna jonë thotë për vete: "Unë jam shërbëtorja e Zotit, erdha për të të shërbyer ty". Çfarë kuptimi mund të ketë kjo shprehje? Sot jemi duke kremtuar Meshën e shenjtë në këtë të kremte të madhe. Por, sot, për banorët e Lezhës po ndodh diçka që na gëzon të gjithëve. Po hapet studioja e Radio Marisë edhe këtu në Lezhë. Cili është qëllimi i Radio Marisë jo vetëm në Lezhë, por në mbarë botën? Sipas meje, e mendoj se nuk gabohem, misioni i Radio Marisë është vënia në jetë e këtyre fjalëve të Zojës Mari. Radio Maria mund t'i thotë këto fjalë që Maria ia tha engjëllit: "Unë jam shërbëtorja e Zotit".

Vërtet, Radio Maria është shërbëtorja e të gjithëve, është si Maria, prandaj quhet Radio Maria. Radio, sepse e dëgjojmë, dhe Maria, sepse është vetë Maria që na flet nëpërmjet saj dhe ecën në shërbim të të gjithëve. Sa herë më ndodh në rrëfime të ndryshme që njerëzit më thonë: "Jam shumë i lumtur, Radio Maria më ndihmon, Radio Maria më jep forcë, më shtyn përpara, më inkurajon në vendimet që marr dhe jetën time." Kjo radio vepron në këtë mënyrë, sepse është si Maria.

Prandaj, ne besimtarët, duke falënderuar Zotin për këtë dhuratë kaq të madhe, duhet të bashkëpunojmë me Radio Marinë edhe nga ana ekonomike, sepse ajo ka nevojë për ne. Ndryshe nuk do të mund të jetonte dot. Një mënyrë tjetër për ta ndihmuar Radio Marinë janë edhe lutjet tona që ia drejtojmë Zotit për mbarëvajtjen e punëve të saj. Duhet të bëjmë lutje të vazhdueshme për të gjithë njerëzit, në veçanti për të sëmurët, si për ata që janë të sëmurë fizikisht, ashtu edhe për ata që janë të sëmurë shpirtërisht.

Vazhdon në fq. 2...

...vazhdim nga fq. 1

Tani Radio Maria është afër nesh. Na ndodh nganjëherë që atje ku ne meshtarët nuk mund të arrijmë, arrin zëri i Radio Marisë që hyn në çdo shtëpi. Prandaj, e falënderoj Don Prekën dhe bashkëpunëtorët e tij për këtë punë madhështore. Sot dua t'u kërkoj besimtarëve e bashkëpunëtorëve që përmes programeve të ndryshme në Radio Mari të vazhdojnë t'i luten Zotit për një qëllim shumë të rëndësishëm, jo vetëm për ne, por edhe për mbarë botën, që të kemi më shumë meshtarë që të jenë afër popullit te vet. Sa herë na flasin njerëzit për mungesën e meshtarëve në fshatra të harruara. Kanë nevojë për rrëfim dhe Meshën e shenjtë. Çfarë mund të bëjmë? Radio Maria do të na ndihmojë në lutjen që Zoti të na dërgojë meshtarë të shumtë e të shenjtë. Këtë gjë e bëjnë dëgjuesit e Radio Marisë, sepse luten për thirrje meshtarake. Le t'i vazhdojmë, pra, këto lutje. Atëherë, pra, të falënderoj Don Prekë që ke pranuar të vish këtu në Lezhë. Don Preka më ka thënë Radio Maria ka shumë besimtarë që janë dëgjues të Radio Marisë në Lezhë. Kjo është diçka që mua më inkurajon të ec para në punën time baritore, sepse jam në vizitë baritore në disa famulli pranë Lezhës. Në çdo vend që shkoj, njerëzit më thonë: "e dëgjoj çdo ditë Radio Marinë". Ky është një bekim i madh. Përsëris atë gjë që thashë në fillimin e Meshës, sikurse Zoti erdhi në tokë për të kryer vullnetin e Atit, kështu edhe Radio Maria erdhi këtu në Lezhë për të kryer vullnetin e Hyjit. Sepse është vullneti i tij që po kremtohet kjo Meshë dhe që po hapet një studio e re e Radio Marisë në Lezhë, të cilën do ta bekojmë pas Meshës.

Faleminderit juve që keni ardhur, që na mbështetni me lutjet tuaja, që jeni afër Radio Marisë për ta ndihmuar me lutjet tuaja, sepse kështu e inkurajojmë Don Prekën që ta vazhdojë këtë shërbim që ka bërë deri më sot me bashkëpunëtorët e tij. Të gjithë premtojmë lutjen tonë të vazhdueshme. Faleminderit të gjithëve. Qoftë lëvdur Jezu Krishti!

Imzot Ottavio Vitale, Ipeskvi i Lezhës

FJALA E PRESIDENTES SË RADIO MARIË ME RASTIN E HAPJES SË SELISË SË RE NË LEZHË



Jam shumë e gëzuar dhe e mocionuar që m'u dha rasti nga kjo foltore e shenjtë t'ju uroj të gjithëve gëzuar festën e Lajmërimit të Zotit tonë Jezu Krishtit, festën e Radio Marisë.

Falënderoj Shkëlqesinë e tij, ipeshkevin e Lezhës, Imzot Ottavio Vitalen, për kremtimin e Meshës së shenjtë për ne, në emër të Zotit, dhe të gjithë meshtarët e tjerë. Falënderoj deputeten e Lezhës, znjsh. Paulina Hotin, dhe përfaqësuesit e pushtetit vendor për praninë e tyre. Ju falënderoj edhe juve dëgjues të dashur që keni ardhur për ta ndarë së bashku këtë gëzim të madh. Kjo tregon dhe njëherë se Radio Maria formon një vëllazëri mes gjithë atyre që e dëgjojnë. Ajo është zëri i Jezusit që dëgjohej, por është edhe zëri i heshtur i Marisë, e cila ndërmjetson që ky zë i Krishtit jo vetëm të dëgjohej, por edhe të vihet në jetë nga ne.

Radio Maria në botë ka filluar në vitin 1981 në Itali dhe sot ajo funksionon në 61 vende të botës. Në Shqipëri, hapja e saj u bë e mundur më 19 korrik të vitit 2003. Për herë të parë për popullin shqiptar u hap një Radio që mori përsipër edukimin fetaro-kulturor të këtij populli të shumëvuajtur gjatë shekujve të kaluar. Që nga kjo ditë, ajo vetëm është rritur. Prej shtatorit të vitit 2005, me anë të internetit, radioja dëgjohej në mbarë botën. Sot, dëgjueshmëria e kësaj radioje mbulon 70% të territorit të vendit tonë, me veprimtari në zonen e veriut, ku së shpejti shpresojmë që ta shtrijmë edhe në jug. Transmetimet bëhen nga studiot që ndodhen në Tiranë e Shkodër, dhe që nga dita e sotme do të fillojnë transmetimet edhe nga studioja që ne do ta bekojmë sot këtu në qytetin tonë të dashur dhe shume kontribues për Radio Marinë.

Të dashur besimtarë, më lejoni që edhe në emrin tuaj ta falënderoj drejtorin e Radio Marisë, Don Prekën, bashke me stafin e tij, për një punë të madhe me shumë dashuri që ka bërë dhe po bën vazhdimisht për forcimin dhe zgjerimin e familjes së Radio Marisë, duke iu dhënë shpresë dhe forcë atyre që vuajnë me anë të zërit të Radio Marisë, i bën ata ta ndjejnë lumturinë që e sjell Lajmi i Mirë i Krishtit, atë lumturi të vërtetë që buron nga plagët e tij dhe shëron plagët tona.

Një falënderim të veçantë për vullnetarët e Radio Marisë për ndihmesën e madhe në rritjen e Radio Marisë, duke treguar në popull se Radio Maria ekziston, se ajo sjell Ungjillin, sjell Krishtin te njerëzit, përforcon zërin e Kishës Katolike, edukon lutjet aq të domosdoshme për një vend si ne, që për 50 vjet nuk mësuam dhe nuk guxam të lusnim as ato pak lutje që i dinim. Këta vullnetarë, që i falënderojmë me gjithë shpirt po punojnë për rritjen e numrit të dëgjuesve, i mobilizojnë dhe i vetëdijësojnë dëgjuesit për ta mbështetur Radio Marinë. Por, asgjë nuk do të bëhej pa ndihmesën tuaj, të dashur besimtarë, që nuk na ka munguar asnjëherë që nga fillimi i funksionimit të saj dhe për këtë nuk gjejmë fjalë për t'ju falënderuar. Por, të jeni të bindur se Zoti do t'ju shumëfishojë këto të mira, sepse Ai vetë e ka thënë këtë gjë. Faleminderit!



**File Preka
Presidente e Radio Marisë Shqiptare**

FJALA E DON PREKËS NË BEKIMIN E SELISË SË RADIO MARISË NË LEZHË



Fort i dashur Atë Imzot Ottavio Vitale, ju falënderoj për kremtimin e kësaj Meshe të shenjtë. Dëshiroj që në emër të të gjithë dëgjuesve të Radio Marisë t'ju falënderoj për afërsinë atërore që e keni treguar që nga çasti kur na pranuat me z. Lulash Ibrajin, në takimin e parë që e kemi pasur para 4 javëve, lidhur me hapjen e studios së Radio Marisë në Lezhë. Aty paraqitëm dëshirën që Zoja e Bekuar ta ketë një fron edhe në qytetin e Besëlidhjes për ta shpallur prej tij shërbimin dhe dashurinë që ka për popullin e vet. Ju falënderoj për kurajën që na dhurovat atë ditë. Ju, gjithashtu, pranuat që ditën e sotme ta kremtojmë së bashku me ju këtu në Katedralen e Lezhës, e cila për ne si katolikë shqiptarë e ka një domethënie tepër të madhe. Ju premtoj se si Radio Mari do ta zbatojmë atë që kërkuat gjatë kësaj meshe prej nesh: për çdo ditë në orën 12 të ditës, bashkë me të gjithë dëgjuesit e Radio Marisë, do ta lusim rruzaren e Zojës për thirrje të shenjta, që populli ynë të ketë meshtarë të mirë dhe të shenjtë, që do t'i prijnë grigjës së vet. Ju premtoj se do të përpiqemi që ta zbatojmë sa më mirë detyrën e shërbimit. Do të mundohemi me të gjithë dëgjuesit e Radio Marisë që t'iu shërbejmë vëllezërve dhe motrave tona

ashtu siç do Zoja. Ju falënderoj që sot, mua dhe të gjithë dëgjuesve të Radio Marisë, na e keni zbuluar një gjë shumë të madhe, na e keni zbuluar vullnesën e Hyjit dhe na keni thënë se "Vullnesa e Zotit është që Radio Maria të jetë edhe në Lezhë". Sot përpara jush, Shkëlqesi, po e paraqes vetëm një pjesë të dëgjuesve të Radio Marisë, por të jeni të sigurt se në këto çaste janë të bashkuar me ne dhjetëra mijëra dëgjues që luten. Ju premtoj se do t'ju përcjellim me lutje në krejt veprimtarinë tuaj baritore. Ju faleminderit për këtë pritje të mrekullueshme që ia keni bërë një pjesë të vogël të familjes së Radio Marisë.

Por, vëllezër dhe motra, çfarë feste do të kishim po të mos ishin këtu të pranishëm dëgjuesit e Radio Marisë. Ju falënderoj për zemërsisht të gjithë juve që jeni këtu, edhe juve që me lot për faqe në këto çaste na përcillni në familjet tuaja. Këtë festë e organizojnë gjithmonë ata që s'mund të jenë me ne. Janë të sëmuret, të moshuarit, dhe dëshiroj t'i përshëndesim me një duartrokkitje. Vëllezër e motra, Radio Maria jeni ju. Ne jemi vetëm shërbëtorë të vegjël që nuk bëjmë asgjë tjetër veçse e shprehim dashurinë që ju e keni për Zotin. Ju faleminderit për krejt mbështetjen që ia bëni Radio Marisë, sepse pa ju Radio Maria nuk do të ishte; pa ndihmën e vejuhës, Radio Maria nuk mund të rritet. Ne jemi i vetmi institucion në Shqipëri, të cilin e mbajnë dëgjuesit, të cilin e mbani ju. Unë nuk kam asnjë mbështetje tjetër përveç dy mbështetjeve, të dyja janë shumë të forta. Mbështetja e parë është Hyji, sepse në jetën time nuk mundem vetëm, pa Zotin, dhe po të ma merrte dikush Zotin nga jeta ime, do të më merrte gjithçka. Pastaj, Zoti gjithmonë m'i dhuron njerëzit e vet, njerëzit që e duan Zotin, e këta njerëz jeni ju, familja e Radio Marisë, ju që jeni të pranishëm këtu në Katedralen e Lezhës dhe ju që jeni nëpër shtëpitë tuaja.

Këtë vit e kemi një sipërmarrje të jashtëzakonshme në Radio Mari, prandaj që nga fillimi i kreshmëve kam kërkuar një ndihmë të veçantë për të. Zoja e bekuar dëshiron që zëri i radios të dëgjohej në çdo pëllëmbë të vendit tonë, edhe në jug. Radio Maria ka shpenzime shumë të mëdha dhe e falënderoj Zotin që kurrë nuk na ka munguar ndihma e dëgjuesve të saj. Por, sa më shumë që rritemi, aq më shumë shtohen edhe nevojat. Ju falënderoj që aq sa keni e ndani përgjysmë, duke e hequr shpesh nga kafshata e gojës dhe e jepni për Radio Marinë. Ju që jeni nga Lezha, dëshiroj t'ju them një gjë: sot e kemi kryer punën më të vogël, sepse ndërtimi dhe pasja e një studioje është gjëja më e vogël. Por, puna më e madhe është t'i dorëzohesh Zotit dhe Ai të na përdorë ty e mua që prej kësaj studioje ta paraqesim vullnesën e Zotit, ta paraqesim Krishtin e gjallë në zemrat e atyre që na dëgjojnë. Pres shumë vullnetarë nga Lezha. Nuk e di, por e kam një ndjenjë se Lezha do të jetë një ndër shtyllat më të mrekullueshme të Radio Marisë, jo vetëm në Shqipëri, por edhe në botë, sepse keni treguar një gjë që nuk e kam imagjinuar, çdo gjë që e bëtë në studion e Radio Marisë, e bëtë vetë. Bëtë gjëra që për tetë vite nuk i bëmë as në Shkodër e as në Tiranë apo në Gjakovë, ku e kemi gjithashtu studion e Radio Marisë. Ju, me lejen e Virgjërës Mari, i bëtë ato që në fillim në Lezhë. Ju falënderoj.

Në Radio Mari nuk e kemi zakon të përmendim emra të veçantë, sepse e kryejmë punën e Zotit, pra Zoti vepron. Kësaj here e bëj një përjashtim. Zoti e përdori Lulashin që ta kryejë këtë vepër këtu në Lezhë. Me këtë falënderim, nuk dëshiroj ta nënvlerësoj punën e të gjithë vullnetarëve, që për rreth tetë vjet punojnë dhe angazhohen këtu. Dëshiroj t'ju them se të gjithë jeni në zemrën e Zojës dhe për të gjithë ju e lus Zotin. Por, ishte e nevojshme që t'i them këto fjalë, sepse nuk mund ta dimë angazhimin që e pati ky burrë gjatë këtyre javëve. E falënderoj, sepse punoi për Zotin dhe për ju. Po të angazhoheshim në Kishë secili me aq sa ka mundësi, e Fejuara e Krishtit, Kisha, do të ndërtohej për mrekulli. Ju lus në emër të Zojës, jepni ndihmesën tuaj në Kishën e Krishtit. Jepni atë gjë që mundeni, sepse Kisha ka nevojë për ne. Nuk mund të veprojmë pa njëri-tjetrin. I peshkvi nuk mund të veprojë pa meshtarë dhe popull. Ati i shenjtë nuk mund të veprojë pa ipeshkvin, meshtarë dhe popull. Falënderoj Zotin që kemi filluar ta bëjmë hapin e parë.

Falënderoj deputeten e Kuvendit të Shqipërisë, znjsh. Paulina Hotin, që iu përgjigj ftesës së Radio Marisë, sepse shpesh herë ftojme personalitete, por nuk vijnë. Ju falënderoj që ishit e përvuajtur dhe e pranuat ftesën dhe erdhët në mesin e të përvuajturve. Ta dini se pjesa më e mirë e popullit shqiptar janë këta njerëz këtu.

Falënderoj për pjesëmarrje në festë bashkësinë "Tempulli i Zotit". Pas Meshës do të merrni një kritikë ose lëvdatë. Para meshës fola me Atë Prelë Gjurashajn, që është i pranishëm shpirtërisht me ne dhe na përcjell përmes internetit - e përshëndesim. Ju falënderoj që e doni Zotin, që i këndon Zotit. Sot na keni dhënë shembull që edhe ne ta duam Zotin dhe t'i këndojmë Atij.

I falënderoj të gjithë vullnetarët e Radio Marisë, në mënyrë të veçantë vullnetarët në Lezhë, me në krye Jakun dhe Zefin. Le t'ia japim dorën njëri-tjetrit, ta çojmë përpara, me ndihmën e Hyjit, këtë vepër të Zotit, që është Radio Maria. Faleminderit të gjithëve! Paçi gjithmonë hirin dhe bekimin e Zotit! Në qoftë se harrova ndokënd, i kërkoj falje, por s'kam dëshiruar t'i harroj. Falënderoj edhe vëllezërit meshtarë që morën pjesë në këtë kremtim, por edhe sepse secilën ditë dhurohen për popullin e vet. Dhëntë Zoti që në zemrat tona të rritet dashuria për Zotin dhe për shpalljen e Fjalës së Tij.

Don Prekë Lazraj

SEMINARI SHPIRTËROR I LUTJES - JAGODË, KOSOVË

Jagodë, Kosovë, 14-20 mars 2011



Në famullinë Shën Gjergjit, në Budisalc të Kosovës, me nismën e famulltarit tonë të ri, Don Robert Jakajt, në kishën e Zembrës së Krishtit në Jagodë, prej datës 14 deri më 20 mars, u mbajt seminari për "Ungjillëzimin e popullit". Don Roberti e bëri të mundur që besimtarët e Lugut të Drinit ta përjetojnë freskinë shpirtërore gjatë këtyre ditëve.

Këtë seminar e drejtoi meshtari ynë i nderuar, drejtori i Radio Marisë Shqiptare, Dr. Don Prekë Lazraj. Ai çdo ditë, nga ora 15 deri në orën 18, pa u lodhur, diti ta paraqesë Fjalën e Hyjit. Kjo fjalë filloi të ndikojë aq fuqishëm në secilin prej nesh që po merrnim pjesë, sa që shumë shpejt filluam ta shohim njëri-tjetrin në mënyrë të re, si të ishim të gjithë vëllezër e motra të një familjeje të vetme. Çastet që përjetuam në këtë javë ishin të pakrahasueshme me diçka tjetër në jetën tonë. Bashkë me Don Prekë Lazrajn, kishin ardhur edhe dy veprimtare të dalluara të Radio Marisë Shqiptare, Orselina Paluca dhe Leonida Qyrsaqi.

Gjatë këtyre ditëve, Fjala e Zotit dhe fuqia e Shpirtit Shenjt i pasuruan zemrat dhe shpirtrat e të gjithë besimtarëve. Temat e trajtuara i pëlqyen të gjithë të pranishmit, sepse morën porosinë e pranisë së Zotit të gjallë, e cila filloi ta çlirojë jetën tonë me anë të meditimit dhe lutjes, e cila u bë ilaç për zemrat tona.

Në seminar ishin të pranishëm shumë besimtarë nga famullia jonë dhe famullitë e tjera përreth. Në fund të seminarit, patëm mundësi të bëheshim edhe "miq të Radio Marisë".

Në fund të çdo ligjërate ditore u kremtua edhe Meshja e shenjtë, ku na u ofrua mundësia për rrëfim dhe kungim. Këtyre ditëve patëm mundësi të mbushemi me Hirin dhe bekimin e Zotit. Çdo gjë që mirë, sepse aty ku është i pranishëm Zoti, aty është mirësia, kuptimi dhe dashuria. Dashtë Zoti që seminare të tilla të organizohen në çdo bashkësi të krishterë në mbarë popullin tonë.

Tunë N. Marku

SEMINARI PËR UNGJILLËZIM "TAKIMI ME HYJIN E GJALLË"

Tiranë, 21-26 mars 2011

Me rastin e 20-vjetorit të hapjes së Kishës "Zemra e Krishtit" në Tiranë, u organizua seminari për Ungjillëzimin e popullit. Edhe pse nga kjo famulli nuk ishin të pranishëm shumë besimtarë, prapëseprapë besimtarët e famullive të tjera iu përgjigjën thirrjes së Zotit dhe morën pjesë në këtë përtëritje shpirtërore. Falënderojmë Zotin që iu dha mundësi besimtarëve që përmes Fjalës që shpalli Dr. Don Prekë Lazraj, Drejtori i Radio Marisë Shqiptare, ta ndjejnë afërsinë e Hyjit dhe të njëri-tjetrit.

Një falënderim edhe famulltarit të famullisë, Atë Armando Çekarelit, që organizoi dhe ishte i pranishëm me besimtarët gjatë gjashtë ditëve të kësaj nisme. Dashtë Zoti që nisma të tilla të organizohen edhe në famulli të tjera të kësaj Arqipeshkvië dhe të ipeshkvive të tjera të vendit tonë.

Falënderojmë Zotin që na vizitoi me Fjalën e vet.



Lazër Linadi

PRO CREDIT BANK

LLOGARIA NË EURO 600388970102

Kodi SWIFT: FEFAALTR

IBAN: AL 45209516090000600388970102

LLOGARIA NË LEK 600388970001

Kodi SWIFT: FEFAALTR

IBAN: AL 56209516090000600388970001

INTESA SAN PAOLO BANK

LLOGARIA NË EURO 1043631803

Kodi SWIFT: USALALTR

IBAN: AL 25208110080000001043631803

LLOGARIA NË LEK 1043631801

Kodi SWIFT: USALALTR

IBAN: AL 79208110080000001043631801

NË ZVICËR ME 5 FRANGA

Duke telefonuar në numrin:

0900123411

Në bankën CREDIT SUISSE

RADIO MARIA

LLOGARIA NË CHF 361173-10-1

IBAN: CH1804835036117310001